



## El sellu

Namás nos falta una cosa p'asegurar que'l sobre va dir onde queremos: **el sellu**. Pa les cartes normales hai que mercar un sellu, pero pa la carta a los **Reis Magos** nun fai falta, val con que lu faigas tu. **Dibuxa nun papel un rectángulu de 3 cm por 2 cm** (nun uses una fueya entera, valte un cachín de papel) pero enantes de cortalu fai dentro **un dibuxu relacionáu cola navidá**. Pa rematar quédate **cortalu**, y **pegalu nel sobre**, na esquina **superior derecha na parte d'alantre**.




## Pidir, pidir

Igual taba bien **escribir una carta pidiendo-yos a los Reis Magos** que de la que pasen nos dexen daqué pa la **nuestra clase**. Escribi primero lo que se t'ocorra, y dempués facéi **una carta ente les idees de tola clase**.



## ¿Sedrá pa salir?

**De camín d'Oriente p'Asturies**, cayó un argayu y ún de los **camellos** quedó p'atrás... Mira ver si yes a quién a ayudalu a atopar otru camín pa reunise colos **Reis Magos** y seguir viaxe.



## A xintar

Nesta sopa de lletres ties que buscar **cinco palabres relacionaes colos Reis Magos**, a ver si yes pa dar con elles.

Q	U	T	Y	U	I	O	P	E	L
C	X	H	L	S	X	Z	T	A	N
Ñ	I	P	C	A	M	E	L	L	U
O	T	Y	U	T	U	M	D	F	G
V	L	H	P	G	L	R	I	M	E
Q	O	A	U	Y	C	Z	X	E	R
E	V	X	Q	P	O	I	S	L	L
P	E	L	Ñ	H	G	E	F	C	D
M	R	W	X	N	U	E	C	H	E
C	A	V	G	B	H	N	I	O	T
N	O	B	R	A	C	X	S	R	E

CAMELLU XUGUETE NUECHE  
REVOLTIXU MELCHOR CARBON



## ¿Sedrá verdá, ho?

Pa rematar, mira ver si les afirmaciones que vienen darréu son verdaderes o falses:

V F

- Na carta a los Reis hai que pidir tolo que nos pete
- Los cuentos y los llibros son un bon regalu de Reis
- Toles neñes y neños tienen muchos regalos per Reis
- Los Reis Magos son tres: Quini, Luis Enrique y Pelé
- La nueche de Reis hai que dir pa la cama sero
- Los regalos más caros son los más guapos
- Los Reis Magos saben falar tolos idiomas



## Cantarinos y llibros

Puedes aprovechar, agora que vas tener más tiempu pa **lleer y cantar**. Vamos proponete delles cosines:

- *¿Sois vosotros los Reis magos?* de Paco Abril.

Ed: Llibros del peixe

- *Cantarinos pa que sueñes* de Tina Gutiérrez.  
Editora del Norte (por si quies deprender un villancicu)

- *Curriverás. Poesía pal primer ciclu de primaria*.

Esbilla de Pablo Rodríguez y Severino Antuña.

Tamien pues deprender esti cantar de Xentiquina que nos dexó Nacho Fonseca pa esta carta: \*

### Los tres reis:

Enriba tres camellos  
y fartucos de ñeve,  
baxen de les montañes  
tres reis del oriente

De nueche, los tres magos,  
mientras los neños duermen,

entren peles ventanes  
a trae-yos xuguetes.

Nun dexes nada en platu  
Nin saltes más a peres,  
Qu'ellos per un furacu

Ven lo que fai la xente.

El vieyu ye Melchor,  
el prietu Baltasar,  
y el del camellu coxu

que va en medio,  
ye Gaspar.

## Despaciñ y con bona lletra...

Yá sabes que los **Reis Magos** saben falar y lleer en tolos idiomas del mundu, aprovecha agora pa escribi-yos **la carta n'asturianu**. Nós vamos ayudate, pero has acordate de que **los Reis nun son p'arrecostinar colos xuguetes** de toles neñes y neños, conque nun te pases pidiendo y dexa pa los demás. Escribi con procuru, **lletra claro y ensin faltes** pa que los Reis entiendan bien lo que pones.

## Aguapiando la carta

Pa que-yos preste más la to carta, puedes **adornala con dalgún dibuxu de los xuguetes** que quies que te traigan; **puedes pintalos, pega-yos papelinos de colores, brillantina...** de xuru que va quedar bien prestosa y orixinal.

## El sobre y les seños

Agora que ficisti la carta, has pone-y **les seños pa que llegue bien y el remite**. El remite son les seños de la persona qu'unvia la carta y **pónense pela parte d'atrás del sobre**. Fáltennos les de los **Reis Magos**, que son les persones a les que queremos que-yos llegue la nuestra carta. Les sos seños has poneles na **parte d'alantre del sobre**, centrao y con **lletra grande y claro**. Por si nun les sabes son: Les sos maxestaes **los Reis Magos, Oriente**.

## Mira ver ehí

Meca, Xira, la rapaza que nos fizo los dibuxos de la carta, taba pensando lo que diba pidi-yos a los Reis y despistóse. Mira ver si yes p'atopar les 6 diferencies qu'hai nestos dibuxos.

(Marcar con un círculu les diferencies)

Dibuxu 1



Dibuxu 2



### Cosadielles:

- ✞ Escríbolo too con munchu procuru, con bien d'ilusión; pongo les mios seños, pégo-y un sellu y métola en buzón.
- ✞ Salieron d'Oriente y empobinaron pa Belén; si quies xuguetes pídi-yoslos a los tres.
- ✞ Salen pela nuechiquina, marchen de la que canta'l gallu y hai xente que les ve cuando-y pisen el callu.
- ✞ Soi un animal, de xuru, grandón y gorrombudu. Y seliquino seliquín pel ermu faigo un camín

Diseñu: veintidoses

Xixón

Cultura  
y Educación

Oficina de Normalización Llingüística

# ACTIVIDADES “Carta a los Reis Magos”

